

ORBELA.



*Orri arboletatik
Diranak erortzen
Aizearen jostallu
Dirade izaten.*

Uda berriyan orri ezea
Arbolan zera agertzen,
Larrugorriyan egondu. dana
Chit polliki dezu jazten;
Negu beltzari diyozu bada
Agur gozo bat egiten,
Eta ederki dezu arbola
Orri ederrez ornitzen.

Zuri zaizkitzu karnabak eta
Pintzanak inguratutzen,
Lana egiñaz polliki dezu
Kabiya antolatutzen;
Kukua ere zeronek dezu
Deituaz erakarritzen,
Egun sentiyan zaizkitzu danak
Musika joaz esnatzen.

Pisti guztiyak maite zaituzte
Bai eta ere gizonak,
Zuk dizkigutzu guri ekartzen
Danentzako berri onak:
Jazten dituzu bada arbolak
Neguan soillik egonak,
Poza artzen du negu guztiyan
Zu agertu zai dagonak.

Erreka chulo batera iñoiz
Baldin bazera erortzen,
Bere ertzian anchen zerade
Gorriturikan gelditzen:
Gero noizebait arrastaluak
Zaitu bereganatutzen,
Andikan saski batera zaitu
Zimaurretako jasotzen.

Oso ederra izandu ziñan
Arbol gañian zeundela,
Atzo aizean jostallu ziñan
Eta gaur zimaaur ustela;
Gizon gaztea uste gabian
Zar biurtzen dan bezela,
Zu ere oraiñ biurtzen zera
Orri ziñana orbela.

JUAN IGNAZIO URANGA.

